

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 270518 26 St
Zenica, 27.07.2026. godine

Općinski sud u Zenici, stečajni sudija Samra Spahić-Drino, odlučujući o prijedlogu za provođenje stečajnog postupka nad stečajnim dužnikom Društvo za trgovinu, transport i usluge „MEMIŠEVIĆ“ d.o.o. Breza, ulica Podžupča bb, Breza, matični broj subjekta upisa: 1-8872, koji je pokrenut po prijedlogu predlagača Društvo za trgovinu, transport i usluge „MEMIŠEVIĆ“ d.o.o. Breza, ulica Podžupča bb, Breza, kojeg zastupa punomoćnik Smailbegović Mirza, advokat iz Breze, dana 27.07.2026. godine, donio je:

RJEŠENJE

Pozivaju se povjerioci i zainteresovana lica da u roku od 30 dana od dana objavljivanja poziva predlože otvaranje stečajnog postupka i uplate predjuma u iznosu od 4.000,00 KM za obezbjeđenje troškova stečajnog postupka, na depozitni račun ovog suda broj: 134-010-0000044837 otvoren kod ASA Banke d.d. Sarajevo, Poslovna jedinica Zenica, te da po izvršenoj uplati predjuma sudu dostave uplatnicu, kao dokaz da je uplata izvršena.

Ukoliko povjerioci i zainteresovana lica u navedenom roku ne predlože otvaranje stečajnog postupka i ne uplate predjuma, stečajni sudija će otvoriti stečajni postupak i odmah zaključiti postupak nad imovinom društva Društvo za trgovinu, transport i usluge „MEMIŠEVIĆ“ d.o.o. Breza, ulica Podžupča bb, Breza, matični broj subjekta upisa: 1-8872, te po pravomoćnosti rješenja o zaključenju stečajnog postupka narediti brisanje ovog društva iz sudskog registra.

Obrazloženje

Predlagač Društvo za trgovinu, transport i usluge „MEMIŠEVIĆ“ d.o.o. Breza, ulica Podžupča bb, Breza, podnio je ovom sudu 03.02.2026. godine prijedlog za otvaranje stečajnog postupka zbog neizmirenih dospjelih obaveza, odnosno zbog platežne nesposobnosti.

Rješenjem ovog suda od 14.04.2026. godine pokrenut je prethodni postupak radi utvrđivanja uvjeta za otvaranje stečajnog postupka nad navedenim društvom, te je za privremenog stečajnog upravnika imenovan Brkić Ilmir iz Visokog, koji je na listi stečajnih upravnika.

Iz Izvještaja privremenog stečajnog upravnika, koji je dostavljen sudu 12.05.2026. godine proizilazi da privremeni stečajni upravnik utvrdio da stečajni dužnik „MEMIŠEVIĆ“ d.o.o. Breza nema evidentiranu imovinu o kojoj bi bilo potrebno posebno brinuti za vrijeme trajanja prethodnog stečajnog postupka, da prema podacima i finansijskih izvještaja, društvo nema iskazanu stalnu imovinu, zalihe, potraživanja niti novčana sredstva, zbog čega nije utvrđena imovina koja bi mogla činiti aktivnu stečajnu masu, a pregledom poslovanja dužnika utvrđeno je da društvo ima značajne akumulirane gubitke, pri čemu je kapital društva iskazan kao negativan u iznosu od -150.576,00 KM što znači da su gubici društva premašili vrijednost osnovnog kapitala i eventualnih pozitivnih stavki kapitala, što ukazuje na stanje dugotrajnog finansijskog urušavanja i prezaduženosti društva te da iz finansijskih izvještaja proizilazi da društvo u 2025. godini nije ostvarilo poslovne prihode, dok je istovremeno iskazan gubitak tekuće godine, što dodatno potvrđuje da društvo ne ostvaruje redovno poslovanje. Pregledom obaveza stečajnog dužnika utvrđeno je da je protiv društva pokrenut postupak prinudne naplate za neplaćeni dug prema Poreznoj upravi Federacije BiH za period 01.2009.-12.2023. godine u iznosu od 124.422,88 KM, sa pripadajućim zateznim kamatama i da je zaprimljen nalog za plaćanje dospjelih obaveza prema Poreznoj upravi Federacije BiH za period 01.2024.-02.2025. godine u iznosu od 16.566,05 KM, koje obaveze potvrđuju da dužnik ima značajne dospjele javne obaveze koje nije izmirivao kroz duži vremenski period. Privremeni stečajni upravnik smatra da je kod stečajnog dužnika nastupila očigledna i izrazita platežna nesposobnost, imajući u vidu da društvo nema evidentiranu imovinu, nema prihode, nema raspoloživa novčana sredstva, ima blokiran

račun i značajne dospjele obaveze. Iz kojeg razloga postoje uslovi za otvaranje stečajnog postupka nad imovinom stečajnog dužnika. Prijedlog za otvaranje stečajnog postupka podnesen je dana 03.02.2026. godine, što je, prema utvrđenim pokazateljima poslovanja i dugotrajnim neizmirenim obavezama, znatno nakon nastupanja platežne nesposobnosti, zbog čega smatra da prijedlog nije podnesen u zakonskom roku od 60 dana od dana nastupanja platežne nesposobnosti. Dalje navodi da je utvrdio da imovina stečajnog dužnika ne može pokriti troškove stečajnog postupka, jer prema raspoloživi podacima društvo ne posjeduje imovinu niti likvidna sredstva iz kojih bi se ti troškovi mogli namiriti te je u slučaju otvaranja stečajnog postupka potrebno da se troškovi postupka prethodno predujme, u skladu sa odlukom suda i odredbama Zakona o stečaju. Poslovanje stečajnog dužnika ne može se nastaviti niti postoje realni pokazatelji da bi se ono moglo ponovo uspostaviti. Izvršenom kontrolom poslovanja dužnika evidentirano je da se akumulirani gubici i obaveze odnose, između ostalog, na neplaćene neto plaće zaposlenicima, neplaćene doprinose i porezne izdatke vezane za plaće, zajedno a pripadajućim kamatama. U finansijskoj dokumentaciji evidentirana je i kratkoročna pozajmica, odnosno kredit, za koji iz raspoložive dokumentacije nije bilo moguće utvrditi ko je povjerilac, odnosno po kojem osnovu je predmetna obaveza nastala. Privremeni stečajni upravnik zaključio je da je stečajni dužnik platežno nesposoban, da ne raspolaže imovinom dovoljnom za vođenje stečajnog postupka, da nije realno očekivati nastavak poslovanja, te da je potrebno da sud dalje postupi u skladu sa utvrđenim stanjem i odredbama Zakona o stečaju.

Privremeni stečajni upravnik je na ročištu održanom 27.07.2026. godine ostao u cijelosti kod navoda iz izvještaja, izjavljujući da društvo MEMIŠEVIĆ d.o.o. Breza ima ispunjene uvjete za otvaranje stečajnog postupka, da ne posjeduje imovinu koja bi predstavljala stečajnu masu niti potraživanja koja bi se mogla unovčiti u stečajnom postupku, da društvo ima evidentirane obaveze prema Poreznoj upravi F BiH a sve u skladu sa navodima iz poglavlja 3.7. Izvještaja privremenog stečajnog upravnika, a prijedlog za pokretanje stečajnog postupka nije podnesen u zakonskom roku jer je platežna nesposobnost dužnika nastupila znatno ranije kako je navedeno u poglavlju 3.6. svog izvještaja. Na upit suda privremeni stečajni upravnik je izjavio da društvo ne posjeduje imovinu koja bi mogla pokriti troškove vođenja postupka te predlože sudu da traži od povjerilaca da predujme troškove stečajnog postupka u iznosu od 4.000,00 KM. Punomoćnik predlagača izjavio je da nema primjedbi niti prigovora na izvještaj privremenog stečajnog upravnika, da je društvo faktički prestalo sa radom 2005. godine, a zakonski zastupnik i osnivač nisu na vrijeme izvršili odjavu zaposlenika zakonskog zastupnika kod nadležne Porezne uprave što je značajno doprinijelo velikom iznosu poreznog duga te predlaže da sud otvori stečajni postupak s obzirom na nedostatak imovine stečajnog dužnika da isti nakon toga zatvori.

Sud je odlučio kao u izreci iz sljedećih razloga.

Kako stečajni dužnik ima obaveze, a nema imovine, pa ni za pokriće troškove stečajnog postupka, to je sud primjenom odredbe člana 102. stav 7. i 8. Zakona o stečaju („Službene novine F BiH“, broj: 53/21), pozvao povjerioce i zainteresovana lica da predlože otvaranje stečajnog postupka i predujme dovoljan novčani iznos za pokrivanje troškova stečajnog postupka (otvaranje i provođenje stečajnog postupka), ukoliko su zainteresovani za vođenje stečajnog postupka. Visina troškova srazmjerno je određena visini troškova koji se očekuju, za koje troškove sud smatra da je dovoljno 4.000,00 KM, imajući u vidu navode privremenog stečajnog upravnika, a radi se o troškovima koji su neophodno potrebni za otvaranje i vođenje stečajnog postupka.

S obzirom na izloženo odlučeno je kao u izreci ovog rješenja primjenom odredbe članu 102. stav 7. i 8. Zakona o stečaju, a ovim rješenjem povjerioci i zainteresovana lica su upozoreni na posljedice propuštanja postupanja po pozivu ovog suda.

PRAVNA POUKA:
Protiv ovog rješenja nije
dozvoljena žalba.

Stečajni sudija:
Samra Spahić-Drino s.r.